

法官之模範

縣令之準繩

聶亦峯先生為宰公牘

譚澤闓敬題

中華民國二十四年一月出版

衡山 聶爾康亦峯原著

孫男其杰校刊

總售處 上海遼陽路聶宅

爲宰
公牘

定價一元二角

選輯大意

一茲輯以公之服官先後爲序。其不知年月者。則按事實之先後。而事實亦有公私大小之殊。皆以要政列前。而以私人訴訟批判列後。間有非公牘者。亦以有關經濟。仍附原卷之中。

一趙莫兩姓案卷獨多。雖加刪汰。仍屬不少。其結案讞語。則仍以殿於岡州再牘。俾讀者知公再任新會時。此案始結。蓋非公莫能結也。

一讀公自序知公牘之刻始自新會莫姓。非公有意著述。故於體例不完。未足以盡公之文。但可作政書讀。而不得以文集目之也。自序謂濂江岡州梅關三牘。皆不過什一之存。先君子重刊時。始續增岡州再牘高涼公牘於後。茲輯又僅選其關於政教倫常學術經濟之犖犖大者。以視原所謂什一之存。又不過半中之半。其無關宏旨者。不錄。特以爲斯世之救急針砭。迷津寶筏。固無取乎多也。後之爲宰者。觀此。已足爲親民之楷模矣。

一以前兩次鋟板。均已散失不完。方今時局變幻。保存尤爲不易。茲第用聚珍鉛印。以期事之易舉。庶免擱置淡忘。後更無從著手。所冀後之人能踵而傳之。斯較鋟板爲尤善矣。

民國二十三年十一月

孫其杰謹識

馬叙

古人之文章。卽經濟也。尙書載堯以來。尙矣。兩漢而後。制誥詔令之詞。奏議箋疏之作。凡關體要。悉足楷模。如朱子社倉遺規。王文成南贛告諭。流傳至今。咸以爲法。近時陳文恭胡文忠遺集。類多經世名言。卽其手札。且有爲輯要刊布。公諸同好者。此當其論事直書時。何嘗有意爲文哉。而文之大者。實在於是。衡山聶公亦峯。以世家子能文章。與恩溥同年通籍。並入詞林。後乃出宰嶺南。論者以不得盡其能事爲憾。今秋恩溥典試南來。亦峯適監內簾事。相見甚歡。暇中出其煎茶閒錄相示。稔知亦峯凡三領州邑。所至皆有聲。閒錄不足以盡之。繼乃得其岡州濂江梅關公牘三冊讀之。然後歎亦峯之文。不盡於是。必如是始足以見亦峯也。夫居官而奉行故事者。欺也。任事而條理不具者。疏也。言事而端委不詳者。陋也。今觀三牘。其稟承於上之文。則據實陳言。不激不隨。務得盡其意而後已。其明諭於下之文。則準情酌理。或予或否。悉各如其意而後已。古之爲神君。爲衆母。何以加焉。蓋本乎任事之心。劑以解事之識。復出以善論事之筆。而其爲文也。遂高乎風雲月露之章。花鳥蟲魚之註。則謂三牘爲經濟可也。爲文章可也。由三牘而廓之。卽謂爲亦峯經濟文章之嚆矢。亦可也。恩溥不能文。然好當世之文。尤好經世之文。而三牘之文如是。能弗爲之傾倒也哉。爰拜手而爲之序。

爲宰公牘

馬叙

同治六年季秋典試使者大理馬恩溥撰於北江舟次

二

自叙

爾康備員東粵。八載於茲。顧念時事方殷。瘡痍未復。撫循匪易。擘畫維勞。自愧菲微。謬膺艱鉅。重以性情愚直。才識迂疏。惟恐上負國恩。下孤民望。玷清芬於祖父。貽惡報於子孫。首唯廉潔自持。時以公忠自勵。凡於地方諸務。無不殫竭血誠。舉所爲保惠斯民。以求盡乎教養之責者。恆惴惴焉弗敢安。蓋以一邑之大。萬姓之多。政務之繁。吏胥僕從之狡且冗。其環伺左右。而嘗試乎吾朦蔽乎吾者。何可勝道。斯卽虛心聽斷。實力講求。清夜自思。神天可質。而信心之處。卽係歉心之處。暗中過失。負疚良多。矧其爲條教號令之微。文字言語之末。尙何斯之能信。竟以登諸梨棗耶。緣新會有趙莫兩姓。互爭價畝一案。轆轤已百餘年。卒致釀斃多命。上臺於爾康履任時。飭令細心勘訊。當經廉得其實。躬座大堂。秉公剖晰。指出案中罅漏。並爲揭破隱微。一時觀政諸人。不禁歡聲雷動。趙姓始惶駭汗服。莫姓亦感激涕零。兩造輸誠。似無遁飾。因未奉訊命案。不敢妄斷是非。唯將田畝情形。據實詳細稟覆。重蒙各憲獎飾有加。維時前中丞者駐節韶陽。詢取案中情弊。因卽其顯而易見者。摘出六十餘條。縷陳電鑒。莫姓因案未訊結。不知了期。遂將摘出各條。刊成一帙。顏曰岡州案論。以爲左券之操。爾康見之。此卽力爲斥禁。良以案猶未結。何可遽作定評。且僅刊刻各條。又無後先諸稟。令人莫知原委。轉覺有目無綱。特令傳諭莫生。無許擅行刊送。乃莫

生刻成此本。率經分送與人。復又覺得履勘稟詳諸稿。增列簡端。而拉雜繁蕪。款式亦多不合。幕客謂爾康曰。此刻已成。勢難中止。曷若略爲刪訂。以免貽識者羞。爰爲酌其去取。正其舛訛。易其名曰岡州公牘。而前乎岡州者爲濂江。後乎岡州者爲梅關。因亦各有公牘之梓焉。然此皆什一之存耳。綜計數載以來。事皆手訂。心血亦不知嘔出幾許。祇以風塵潦草。鄙俗自嫌。信手亂塗。卽亦隨手散失。曷敢視同敝帚。稍存問世之心。茲既刊刻成編。亦復無庸終闕。容俟再爲蒐緝。續付手民。想大雅見之。當亦憫其愚而笑其拙也已。時在同治二年十月上浣。亦峯聶爾康謹識於珠江寓館。

仲芳公跋

右爲宰三牘。先大夫官嶺南時所記。留以自省者也。門生部民。借觀無虛日。因付手民。以公同好。書成。索者紛至。無暇釐校。迨先大夫棄養。緝槩奉太夫人還湘。欲重刊行世久矣。取視原板。已頗漫闕。緝槩懼歲久漫闕滋多。致令先澤就湮。苦舊稿無存。印本又悉爲人索去。物換星移。有懷未逮。今年夏。從卓斗樞孝廉處借到印本。爰就校閱補鋟。重印若干本。以行於世。並編輯岡州再牘四卷。高涼公牘一卷。附於是書之末。庶幾先大夫體國勤官之志。積久而彌彰。而緝槩等亦可隨時諷誦。與先太高祖樂山公誠子書共勉云。至其中書體譌謬。點畫贅闕。則匆促恐猶不免。自維謏陋。未敢輕是非。尙冀當世博雅君子。有以訂正之焉。

光緒己卯秋九月男緝槩謹跋

濂江公牘

按此係公牘

到任示

咸豐七年十一月十八日

爲曉諭事。照得本縣權篆斯土。唯求有益於民。而斷不敢以怠忽苟且之爲爲之也。凡於地方公事。有利當興。有弊當去。有冤當理。有廢當修者。但使見聞所及。無不實力舉行。向聞此間俗尚頗醜。民知畏法。大抵勤儉自守。好義急公。守望相資。實堪嘉尚。唯間有險健之徒。慣行唆訟。以至小民被其愚弄。受累無窮。業經本縣嚴飭代書。嗣後遇有必須呈控之事。唯宜據實直陳。本縣隨到隨傳。隨審隨結。無不虛衷判斷。一秉至公。如有得受賄私。枉法殃民者。天地神明。定加誅殛。至本縣所延幕友。俱係端士正人。亦無管事官親在外招搖撞騙。唯恐吏胥僕從。防範難周。或敢狼狽爲奸。甚至指官嚇詐。准爾等紳民立時網送到官。以憑盡法懲治。然或訊無實據。亦必從嚴反坐。以儆刁誣。至於紳監秀良。實爲合邑之望。或以詩文相質。或以守衛相商。或以閭閻疾苦相聞。或以政治得失相勗。本縣無不隨時接見。敬禮有加。却不得稍涉己私。妄干公事。他如農工商賈。以及負販細民。但使本業各安。無不愛之如子。其有奸胥蠹役。土棍訟師。以及竊盜匪徒。凡爲不法者。苟能悔悟自新。概予寬其既往。倘敢以身試法。怙惡不悛。除出示招告外。定當密訪嚴拏。搜除務盡。斷不使稍留餘孽。貽害我民。蓋除莠乃可以安良。而警一卽可以戒百也。本縣世

受國恩。職司民牧。盟心似水。執法如山。茲於下車之初。不惜諄諄誠諭。爾紳民人等亦宜曲體苦心。互相勸勉。羣共趨於良善。毋更蹈於愆尤。則風俗益醴。人心益正。以永享夫恬熙雍睦之床。是則職斯土者之所厚幸也。夫。懷之。特示。

息訟示

照得爲政之道。首在安民。而安民之端。莫先息訟。粵東向多健訟之徒。且有圖告不圖審之說。不知非民之好訟也。有唆之訟者也。非民之不圖審也。有阻之使不得審者也。蓋訟棍之所以唆訟者。原欲魚肉斯民也。若一令赴審。便當結案。彼卽無從而魚肉之矣。於是多方恐嚇。百計阻撓。架砌虛詞。隨時變幻。經年累月。迭控不休。甚至兩造蕩產傾家。俱欲罷手。而訟棍猶擯唆不已。以逞其刀筆之能。噫嘻。此愚民之所爲愚也。故欲息訟。必先除訟棍。業經本縣出示招告。並嚴密訪拏。盡法懲治。以除民害。爾紳民人等亦宜各安本分。恪守天良。勿近奸邪。勿爲非僻。勿欺懦弱。勿占便宜。縱使橫逆之來。不妨再三忍受。古人云。忍得一時之氣。免得一世之憂。此言深有至理。蓋人間欺我。人斷不能欺天。天道無私。報應不爽。迨至欺我者身受其報。而我之甘受人欺者。既享和平之福。且博忠厚之名。以視夫狀入公門。票傳私室。匍匐階下。拘繫獄中。產破家亡。禍猶不止者。其苦樂爲何如耶。嗣後除有萬難刻緩之事。准其隨時稟控外。其餘一切尋常控案。仍當按期呈遞。不得擅自鳴冤。蓋如此相爭。不過一時之忿。稍遲時日。氣已漸平。或經族戚

解和。或被鄉鄰勸阻。前嫌頓釋。後患俱消。若一到公堂。便難中止。縱使所控得直。而荒時廢業。所失已多。事後追維。能無悔恨。何況毒流鄉里。累及身家。仇結子孫。怨連戚族。訟之爲害。何可勝言。此凡事不務強忍之爲愈也。如實不能忍者。亦當於三八放告日期。本人親至代書處訴說實情。令其據實書寫。不得聽信挑唆。妄行架砌。其有自作詞稿者。亦必本人親到。方准蓋戳。并着取具歇保。聽候傳訊。至於紳衿婦女。應用抱告者。亦須隨傳隨到。以便早爲訊結。如傳訊不到。卽將歇保責革。并將呈詞撤銷。不准再告。至婦女之有父有翁有夫有子孫者。均着夫男出名。不得任其妄控。除嚴飭代書敬謹遵照外。合行出示曉諭。爲此示仰紳民人等知悉。自示之後。務宜曲體本縣訓諭苦心。展轉誥誡。要使家諭戶曉。以期訟簡刑清。則親睦之風。可計日俟矣。懍之。特諭。

嚴拏訟棍示

爲出示招告以除民害事。照得明刑爲弼教之資。除莠乃安良之要。本縣權篆斯土。唯求利濟羣生。斷不容兇惡匪徒。留爲民害。爲此示仰軍民人等知悉。如有訟棍土豪奸胥蠹役。以及積匪猾賊。凡爲不法者。苟能悔悟自新。概予寬其既往。倘敢以身試法。怙惡不悛。除一面嚴密訪拏外。准爾紳民人等指名控告。以憑盡法懲治。務絕根株。本縣心若冰清。情同火烈。愛民如子。嫉惡如仇。言出法隨。決不稍貸。凜之。特諭。

諭多士示

爲端士習以正人心事。照得士爲四民之首。當思所以實副乎名。其立品貴端。其立心貴厚。其立志貴高。且遠。其立行貴正大而光明。蓋今日鄉里之秀良。卽異日國家之碩彥也。今日躬行之事蹟。卽異日觀法之師資也。朝廷之所以重士者以此。士之所以自重者亦以此。士不自重。尙得謂之士乎。石邑俗尙頗淳。民知好義。從前抱道守經之士。要皆砥礪廉隅。無如習俗移人。漸趨澆僞。其愚而好事者無論矣。卽間有才質可造者。輒復狂妄自矜。嬉遊自廢。但博一衿到手。便如位極人臣。不思恪守臥碑。勤脩舉業。更圖上進。力爭上流。而斤斤然以武斷爲能。以把持爲力。以舞弄架唆爲慧業。以侵漁沾染爲生涯。甚或糾衆搶奪。行同劫盜。種種惡習。不可勝言。而安舖地方爲尤甚。卽如廩生馬等。向亦頗知自愛。近乃甘爲敗類。竟有去年糾搶客商數百金之事。經前任移學拘傳。至今尙未結案。又如武生戚現有控其統衆兇搶之事。亦經傳訊在案。至於楊等。則更不知道理爲何物。恃其附入武庠。竟敢夜郎自大。無論何項公事。動輒聯名數十。任意妄呈。并以異地監生。冒名入稟。及至飭傳質問。又皆畏匿不前。且聞其屢次入城。干與公事。時竟以合墟捐題經費。作爲若輩火食夫價之資。並敢於書院育才重地。作爲若輩議事聚訟之所。此等惡習。究竟開自何時。若不及早懲除。實爲世道人心之害。蓋人心不正。皆由於士習不端。愚賤效尤。勢將胡底。倘異日變本加厲。必將有追咎於本縣之姑息養奸者矣。豈職司風化者。而顧忍坐視我民之被其濡染而不爲預遏其流耶。第念冒昧聯名。不無誣捏。若引生員好訟多事之例。概行斥革。

未免株累太多。當擇其劣蹟之最著者。略懲一二以儆其餘。倘能悔悟自新。悉予寬其既往。如敢怙終不改。定當按律嚴懲。爲此示仰閭邑生監等知悉。自示之後。其各體苦心。痛加改悔。一洗從前惡習。以期力挽頹風。則士習以端。而人心自正。將見和平日積。仁讓風行。上之可爲國家有用之才。下之亦不失爲鄉里有道之士。其有裨於世道人心者。豈淺鮮哉。懍之特諭。

再行嚴禁試場諸弊示

爲再行嚴禁試場諸弊事。照得讀書首宜立品。求慊必先戒欺。從未有行險徼倖之小人。而能有所成就者也。國家以制藝取士。原欲拔取真材。以爲異日棟梁之選。而其要則端自童子試始。蓋異日之掇巍科躋顯秩。潤色鴻業。職掌文衡。以至宅揆封圻。銘鍾勒鼎。何莫非此童試之人爲之耶。於此而不自愛。則本根已失。遑問其他。縱令徼倖有成。適足貽羞士類。他日出身行政。亦不過小人之尤耳。尙安望其不負吾君不負吾學不負吾心耶。粵中風尙夙隆。人知勵品。從前鴻儒碩彥。理學名臣。代不乏人。後先照耀。乃沂日世風一變。竟多以賄相高。或買案元。或買前列。或買完場。奇貨可居。明買明賣。通行大市。大抵如斯矣。顧念石邑學額。祇得八名。除縣府兩案首外。僅餘六名。而此六名者。或係前列。或係完場。又皆有鎗替傳遞以售其奸。雖有聖神。其何能察。嗟我寒士。窮年矻矻。事畜都拋。而欲於此時出其一枝。以與錢神爭勝。其能濟乎。此所以不必讀書。唯須牟利也。蓋在富者取攜甚便。早已打定主意。不過花費幾個臭錢。便可

唯其所欲。何用更爲迂苦。必須親自讀書。卽在貧者。亦知力難與較。然與其讀書不能制勝。不若改而營利。以爲應試時賄取案首前列以及雇倩鎗替傳遞之資。較之攻苦讀書。似覺稍有把握。何況入學以後。便有祖業分肥。小往大來。有何不可以致富者。日益驕橫。罔知禮義。貧者日趨卑鄙。妄肆鑽營。無怪乎文教失傳。天良盡泯。江河日下。究將何所底止耶。本縣洞察情弊。怒焉隱憂。因於示期考試時。詳晰出示曉諭。又恐該文童等。以從前歷任亦皆張貼告示。後仍聞或出售。遂以本縣此諭。亦係奉行故事。掩耳盜鈴。特又明白曉諭。並爲盟誓以要。如有鬻賣案首。以及賄取前列者。天誅地滅。永絕子孫。蓋欲爾等之深信不疑。免爲奸徒撞騙。庶使眞才實學。得以各盡所長。不致令寒士含冤。末由發跡也。爾等如果有志向上。一見本縣此諭。當必洗心滌慮。各奏爾能以無負本縣一片培植人材之至意。乃竟不知自愛。仍以詭遇爲心。邀請庸劣秀才。肆行鎗替。編取暗號。十百爲羣。拋遞鎗頭。轉爲分致。此等下流氣習。實屬有玷斯文。業經本縣訪聞。查出二十餘號。本欲按名根究。因見人數太衆。不忍過事株求。只得格外姑容。概行記卷不閱。昨已當堂誠諭。務宜痛改前非。切勿再犯場規。求榮反辱。詎意下愚成性。怙惡不悛。舞弊行私。依然如昨。且以本縣巡查嚴密。無計可施。竟敢賄通本縣家人。代爲傳遞。當經本縣覺察。究出實情。業將首先應允之家人胡昌一名。責押羈所。聽候嚴辦。其餘知情不首之家人陳太等。概行逐出。以儆奸邪。所有爾等生童賄通之處。自應一律治罪。方足以昭平允。然本縣恩不嫌過。待士尤慈。卽至萬無可寬。猶復曲爲

容隱。且看爾等下次是何光景。再行定奪。如能幡然改悔。便可不復深求。若再自外生成。卽亦無嫌過刻。本縣如衡如水。如石如鏡。凡於汝等各卷。無不細加校閱。卽或萬分不通之作。悉皆耐苦看完。但有一句稍通。亦必特爲圈出。無論各牌名次。逐爲再四推求。卽取列榜末之文。亦無不細校微茫。分別上下。本縣如此相待。而汝等竟不知感。且忍自欺。則是汝等別有肺腸。又何必苦心苦口。至再至三。諄諄誥誡爲耶。然此亦皆甘於暴棄者之所爲。而非所論於廉隅自勵者也。若現在所取前列。以及前二百名。率皆面試多場。俱皆蔚然彪炳。綽有可觀。亟宜努力前修。勉圖上進。後來發越。正未有涯。至若不知自愛之徒。則自有朝廷之法在。榮辱禍福。唯其自擇焉耳。懍之。特示。

嚴禁遊神演戲聚賭招娼示

爲嚴禁遊神演戲聚賭招娼以肅地方以維風化事。照得禮隆報賽。原民志所樂從。而俗尙嬉淫。亦王章所必禁。茲查本邑尊神靈蹟懋昭。誠求悉應。雖不列於祀典。實有造於斯民。向於二月初九等日遊城演戲。以答神庥。昨據邑紳全元愷等呈簿請捐。本縣以吾民託庇之神。卽亦不容自己。因特捐錢五千。立付該生領訖。第聞此間陋習。不過借神爲名。到處歛錢。希圖染指。竟將神像縛置肩輿。到處巡遊。肆行狎侮。并於校場搭台演戲。晝夜不分。舉國若狂。四方雲集。且於戲台左右。連搭高棚。招集土娼。歡呼暢飲。男女混雜。廉恥淪亡。稍有人心。定知痛恨。豈福惠正神。必欲汝等如此穢褻。乃爲誠敬耶。慢神虐民。莫此爲甚。

傷風敗俗。更不忍言。卽在常時。亦當嚴禁。況今靈山未復。廉郡戒嚴。茂名化州。頻聞風鶴。府城防堵。不敢稍疎。博白陸川。時傳警報。當此四方多事。正我官民戰兢惕厲之時。朝夕防維。猶恐未逮。尙何暇荒時廢業。爲此治遊。致令娼賭橫行。盜賊混跡。萬一有失。咎將誰歸。豈汝等只顧數日嬉遊。頓忘一邑利害耶。合行出示嚴禁。爲此示仰闔邑軍民人等知悉。屆期如有酬神還願者。准各虔備香燭供品。恭詣神祠敬謹叩謝。拜畢卽各歸家。無容停滯。其無事酬神者。不得隨聲附和。逐隊遊觀。至於抬神遊城。裝燈演戲。以及一切招聚娼賭。販賣酒食等事。概行嚴切禁止。如有違抗不遵。妄思異議者。除將本人鎖拏究辦外。并將該首事等一併治罪。如謂錢已斂就。不便退還。准爾該首事等妥爲收存。容俟各處清平。補行演戲。却不務爲輜褻。以瀆神威。神若有知。定當福汝。神如降罪。則本縣一人承之。斷不爲爾等累也。本縣爲爾等保護身家維持風化起見。該首事等務各及早停止。通飭恪遵。幸勿以身試法。自貽後悔也。懍之。特示。

嚴禁瓦罐葬親示

爲申明例禁嚴切曉諭以挽惡習而杜訟源事。照得朝廷立法。首嚴不孝之誅。人子事親。當繹無違之旨。蓋喪葬唯期乎盡禮。而墳塋尤冀其永安。此貴賤所同然。而智愚所固有者也。乃聞石邑風俗。於其祖父方死之頃。卽存一將來改葬之心。殮以薄材。瘞之污壤。故令水淹蟻蛀。以速其朽且化。而後邀同族衆。舂鍤相偕。發塚劈棺。取骸檢驗。其尙有枯筋纏絡血痕漬滯者。則以刀銼刮剔之。以鼎鑊糜煮之。傾置盆中。

混加洗滌。然後請之入甕。其甕與常製異。上下相合如缸。高廣俱不盈尺。底鑿數孔。以吸地氣。有專門業此以濟惡者。美其名曰金確。只此咫尺餘金確中。舉所謂三百六十五節骨殖者。無論爲首爲足爲面爲背。羣焉顛倒錯亂於其中。而仁人孝子之心。於是乎大慰矣。遂乃邀請地師。購求吉地。選時擇日。重奠牛眠。戚友親鄰。咸相走賀。鮮不以爲發福發祥。可計日俟。迨至久無佳耗。甚或轉見衰頹。則又將此金確再發再挖。再確再瘞。並聞有一歲屢遷。卒至拋棄而不敢聲張者。蓋以金確取攜甚便。費用無多。可以爲所欲爲。不若舁棺遷葬之艱於舉事也。然此猶不過惑於風水之說。罔知禮義之徒。將其祖父之枯骸。以爲子孫邀福之具耳。又有婪人吉壤。詭謀侵葬。私將骸確附他人之墓側。以分其利。迨至主家知覺。投族告官。受罰受刑。仍然斷令遷葬。未得其利而先受其害。亦何樂而爲此。然此猶不過意在吉地。成此陰謀。而非有訛詐勒索於其間也。又有奸狡之徒。或因貧困難堪。或因訛詐不遂。特挖祖墳一具。葬入他人墳山。騎頂當胸。故碍風水。勒索幫錢改葬。方肯遷回者。並有用確盛取猪狗他骨。暗埋人墳。誣人換易者。亦有埋一空確。誣人拋棄者。且有預埋破確。誣人毀確棄骸者。種種虛誣。不堪枚舉。然此猶不過捏詞訛詐。非真有毀棄換易之事也。詎意婪吉之徒。因見無人守墓。竟於昏夜挖塚出骸。投諸水火。卽以其祖之骸易置罐內。修築完好。主家不知。猶時時祭拜他人之祖父以祈福。而卒無一效。且歸咎於此地之無靈。又復挖出再遷。更求吉地。而此盜葬之子若孫。咸竊竊然深幸詭計之復售。而笑人之盡孝。乃曾不轉瞬。而此盜